

# **AGENDRE TRINITATIS**

## **MINGGU 13 OKTOBER 2024**

### 1. FANGOWAI BA FOGAONI

*(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).*

- Fangowai** :  
**SA** : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.  
**SATO** : Ya'ahowu !  
**SA** : Ya faofao khömi Lowalangi...  
**SATO** : Ya fao Khöu Geheha-Nia  
**Fogaoni** :  
**SA** : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 18**

### 18. HE TÖDÖGU ANUNÖ 1

do = g 6/4

MM = 104 - 108

1. He tödögu, anunö, suno Lowalangi, Ama.  
 Böi olifu ndra' ugö, mbuala nibe ' e- Nia.  
 Me no aefa ndra' ugö, sawuyu horömö.  
 Ba no göi Ikaoni ' ö fa ' ebua dödö,  
 sifao fondrara dödö ba fangorifi göi.  
 Fefu dana khö-Nia, lö irai Iböhöi.
2. No Ifa' ema khöda, daroma li fangorifi.  
 Si möi fangefa horö, börö Yesu, Sangöhöli.  
 Sebua tödö Ia, ba solakhömi göi.  
 Ibè wa' anau gölö, ena' ö lö faröi,  
 Ba fefu golalöwa, no oi te' asiwai.  
 Börö Keriso, Yesu, same' e fa' auri.

### 2. FANGA'ARO'Ö WA'OWULO (VOTUM)

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):  
 No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

**SATO** : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gage ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

**SA** : **Manunö** : BZ. : 452

**Haleluya..... Haleluya..... Haleluya.....**

**SA** : Mangandrö ita :

He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö

nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. (Mudadao zato)

### 3. MANUNÖ moroi ba Mbuku Zinunö Numero 270

#### 270. HEZA TASÖNDRA ZARO DÖDÖDA

Lala : Yesu So' aya Tolo Ndra' aga ( No. 356)

do = g 3/4

MM = 88 - 96

1. Heza tasöndra, zaro dödöda.  
Si mane Yesu So' aya, sangefa fefu horöda  
sangomasi' ö, sangesa tödö.
2. Ha zi faoma töi, khö Yesu andrö.  
He mala' ika zorugo, he razo ba gulidanö.  
Lö si faoma töi, me Sangorifi.

### 4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **I Moze 15:1-6**

1. Ba me no aefa da'ö no mege, ba humede Yehowa khö Gaberamo, ba gangilata, imane: Böi ata'u ndra'ugö, Aberamo; baluseu ndra'o, luou, ba börö zebua.
2. Ba imane Aberamo: He So'aya Yehowa, hadia nibe'eu khögu? mowaöwaö manö ndra'o ba lö onogu, ba sanema ondröitagu dania, ba Eliezeri andrö, banua Ndramaseko.
3. Ba imane na Aberamo: Lõ'ö sa nibe'eu khögu nga'ötö, ba tobali sanema ondröitagu, ba sawuyu baomogu.
4. Ba humede khönia Yehowa, imane: Tenga sanema ondröitamö da'ö, si otarai nõsiu dania, da'ö zanema ondröitamö.
5. Ba i'ohe ia baero baewali ba imane: Faigi mbanua si yawa ba erai ndröfi; hadia, ö'ila maö ö'erai? Ba imane na khönia: Si manö [wa'oya] ma'uwumö dania.
6. Ba faduhu dödünia khö Yehowa, ba ibe'e fa'atulö dödünia da'ö Yehowa.

Simanö daroma Li Lowalangi, da tatema'ö faoma sinunö: BZ.Numero 20:1

#### BZ. No: 20. MISUNOSUNO ZO'AYA

1. Misunosuno Zo'aya, mi bè zumange-Nia.  
Mi'ebua' ö döi-Nia, sotöi banua-Nia.  
Me no Ikaoni göi ami, afu mitemawa'auri, khö Yesu, Sangorifi.

### 5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

#### Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödüma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödü-U, ena'ö Ö'efa'ö khöma höröma andrö si no mafalua, irege

sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

**SATO** : Manunö : BZ. Numero 224 : 1

## 224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

**SA** : **Turia Wangefa horö** : "Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö.  
LAKHÖMI KHÖ LOWALANGI SI YAWA.....

**SATO** : Manunö:

## 450. BA FA'ATULÖ BA GULIDANÖ

1. Ba fa 'a tulö ba gulidanö ba niha ni'omasi 'ö andrö  
(mudadao zato)

### 6. FOMBASO TAROMA LI LOWALANGI FÖNA HUHUUO (AB)

- : Da tafondrondrongo daroma Li Lowalangi, tehalö moroi ba zura **Roma 1:16-17**  
**16. Lõ'ö sa ailado ba duria somuso dödö andrö; noa sa fa'abölö Lowalangi ia, ba wangorifi samati andrö fefu, ba niha Yehuda ua ba ba Ndrawa Heleni göi.**
- 17. Tefa'ele'ö sa ba khönia wa'atulö dödö khö Lowalangi, moroi ba wamati ba ba wamati zui lualua, si mane si so ba zura: "Ba wamati isöndra wa'auri satulö tödö."**

Ya'ahowu zamondrongo taroma li Lowalangi ba same'e ba dödö.

**SA+SATO** : Yaduhu

### 8. FASÖMBATA

**SA** : Iada'e tebe'e khöda ginötö ba wamalua owasa Wamasi nidönia Pendeta

**SA** : Iada'e tebe'e khöda ginötö ba wolohe fasömbata khö Lowalangi. Ta'osamuzaigö wame'e, he fasömbata si föföna, ba simanö göi zi mendrua awö zi medölu. Ba si föföna ua da tafondrondrongo Li Lowalangi me imane:  
❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrö khö Lowalangi.

**SA** : Tafa'ema wasömbata khö Lowalangi, manunö ita moroi ba Mbuku Zinunö **Numero 260**

## 260. NO OYA NITEMADA 1

do = es 4/4

MM = 88 - 96

1. No oya nitemada buala Zo' aya.  
Sinangea ta ' andrö saohagölö-Nia.
2. Botoda, ba nosoda talulu khö-Nia.  
He lala halöwöda, ya sumange-Nia.
3. A' oi Ifahowu' ö halöwö dangada.  
Ta' andrö saohagölö, zi no Ibè khöda.
4. Andrö mo' ömö ita wamè fasömbata.

- Tabè sumange-Nia, moroi ba dödöda.
5. Ya' ugö gubaloma ba lala döröwa  
Ba zomasi Ndra' ugö fatörö ndra' aga.
  6. Ma' andrö khö-U So' aya rorogö ndra' aga  
Sagötö fekolima ba fahowu' öga.

*Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö ( irama lagu ).Fatua lö möi ira wolohe föna, ba imane Sangai Agendre:)*

“Da tafasao wasömbatada andre föna Lowalangi,.....Muzizio ita fefu.....  
Manunö ita moroi ba Mbuku Zinunö numero 261

## 261. YA'E ZUMANGE <sup>1</sup>

*Ira'alawe* □

1. Ya' e zumange fasömbata, ma' ohe sumange Yehowa.

*Iramatua*

- Reff* : Ma'andrö khö-U fahowu'ö zumange ni'ohema khö-Mö
2. Ya'e zumange fasömbata mabe'e soroi ba dödöma.  
*Reff* : Ma'andrö khö-U ....
  3. Ya'e zumange fasömbata buala si'otarai Nama.  
*Reff* : Ma'andrö khö-U ....
  4. Ya'e zumange fasömbata, boto, noso, ba fa'aurima  
*Reff* : Ma'andrö khö-U ....
  5. Ya'e zumange fasömbata, lö irugi zomasi dödö-U.  
*Reff* : Ma'andrö khö-U ....
  6. Ya'e zumange fasömbata, ma'aohasi gölö Zo'aya.  
*Reff* : Ma'andrö khö-U ....

**FANGANDRÖ** : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, bti ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*)

### 8. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:  
Koor ba Vokal Group
- a. Koor Jemaat
  - b. Kegiatana Komisi Perempuan (Koor/Vokal Grup)
  - c. Kegiatana sektor 3 (Koor/Vokal Grup)
  - d. Kegiatana Koremda
  - e. ....

### 9. MANUNÖ

- SA** : Da tafa'anö dödöda wamondrongo taroma Li Lowalangi, manunö ita moroi  
Ba Mbuku Zinunö **numero 163**

## 163. UHONOGÖ SIBAI DÖDÖGU

1. Uhonogö sibai dödögu ba wamondrongo li Mö Yesu  
Mangalulu ndra'odo föna-U ba gametahö-Mö ia da'a  
Öbayoini Eheha-U Yesu dozigö mbanua samati khö-U.  
Ubokai dödögu khö-U Yesu nahia daroma li-U.  
Taroma li-Mö lö fa'atebulö menewi ma'ökhö ba si'ogötö'ö lö sa mamalö.  
Taroma li-Mö si möi fangabölö utema'ö soroi ba dödö, tolo ba wolo'ö.

### 10. HUHUA SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi,  
Sabölö moroi ba gera'era niha fefu, ba khö Keriso Yesu. Mangandrö  
ita.....Yaduhu.

- a. Fombaso taroma Li Lowalangi *Habakuki / Habakuk 2:1-4 (Tuho Migu :Niha Satulö Tödö ba Wamatinia Auri Ia / Orang Benar Akan Hidup Oleh Percayanya)*
- b. Fanuriaigö
- c. Nitanö ba dödö. *Habakuki / Habakuk 2:4b (Ba satulö tödö, b aba wamatinia auri ia. / Tetapi orang yang benar itu akan hidup oleh percayanya.)*
- d. Fangandrö Fanga'aro'ö huhuo

**SATO** : Manunö : BZ. Numero 154 : 1

## 154. NO MAFONDRONDRONGO LIU <sup>2</sup>

1. No mafondrongo li-U, Lowalangi So ' aya.  
Tanö ba dödöma ia, fa böi olifuga.  
Fahowu 'ö ia khöma, ena ' ö ohahau dödöma fefu.  
Heta ba dödö zi lö sökhi, ma'o ' ö niwa 'ö-U.

### 11. TUHO WAMATI

**SA** : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

- SA+SATO** :
- ❖ Ya'o mamati khö Lowalangi Ama si lö ambö fa'abölö, somböi banua si yawa awö danö.
  - ❖ Ya'o mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
  - ❖ Ya'o mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

### 12. ANGOMBAKHATA BA MBANUA NIHA KERISO

**13. SA** : Da tafondrongo gangombakhata:.....

### FAMALUA HALÖW FEMANGA GÖ NI'AMONI'Ö

### 14. MANUNÖ

**SA** : Manunö ita moroi ba Mbuku Zinunö **numero: 210 ayati 1-2**

## 210. MAMATIDO KHÖU YESU

Lala : Masuno' ö Yehowa ( No. 3 )

do = f 3/4

MM = 96 - 104

1. Mamatido khö-U Yesu, wa si lö faröi Ndra' ugö.  
Te ' ala wa ' aurigu, na ya ' odo zamatörö.  
Yesu, u ' andrö khö-Mö, be ' e wa ' anau gölö.
2. Mamatido khö-U Yesu, he fahöna wanandraigö.  
Wa lö Ölulu ndra' o, ba ngawalö zagafökhö.  
Andrö wa lö ubato, wangandrö soroi dödö.

## 15. FANGANDRÖ SALAHI + FAMATENGE + HOWUHOWU

**SH** : Muzizio ita fefu, mangandrö ita :.....(totohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

**SH + SATO** : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatorö banua-U, ba sokhö fa'abölö, awö lakhömi, irugi zi lö aetu. Yaduhu

**SH** : FAMATENGE + HOWUHOWU :  
Mi'angawuli si fao fa'ohahau dödö, ya tobali ami sura Keriso, samaduhu'ö Ya'ia ba Lala wa'aurimi sero ma'ökhö, ba mitema (tatema) howuhowu Lowalangi :  
❖ Ya mufahowu'ö ami/ita Lowalangi, Ya murorogö ami/ita  
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda  
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

**SATO** : Manunö BZ.Numero 325 ayati 3

## 210. MAMATIDO KHÖU YESU

Lala : Masuno' ö Yehowa ( No. 3 )

do = f 3/4

MM = 96 - 104

3. Mamatido khö-U Yesu, fatörö manö ndra'odo.

Ba zomasi Ndra'ugö, gofu heza ö'ohedo.

Me lö sanolo ya' o, baero Yesu Keriso.

**SH** : YA'AHOWU

**SATO** : YA'AHOWU